

Premier Wever-Croes relaciona cu acusacion di Minister Rudy Lampe:

‘Minister Lampe mester compronde cu e ta demisionario’

Minister Rudy Lampe ayera a lansa un atake ferros contra Premier Evelyn Wever-Croes, entregando un carta na Gobernador pidiendo pa pone e Ministerio di Enseñansa bou di curatela. E motibo segun Lampe, ta cu Premier Wever-Croes a dicidi di para dos decision recien di Lampe.

Esaki prome minister a declara den un comunicado di prensa. “E prome ta un decision recien di Lampe pa saca un parti di Scol Reina Beatrix y prop nan den edificio di Scol Paso pa Futuro. Premier Wever-Croes a wordo avisa di e plannan recien di e mudamento aki, door di mayor-

nan y docentenan preocupa y malcontento principalmente pasobra nan no a wordo consulta.”

“Mi a haya mi obliga na tuma e decision aki pasobra e mudamento aki no ta ‘lopende zaken’. E ta un cambio drastico pa ambos scol y ta algo cu e minister demisionario mester laga pa e minister nobo tuma. Henter demas miembro di congreso di minister tabata di acuerdo cu mi y nan a sostene e decision. Pues ta un decision legitimo durante un periodo demisionario”, Prome Minister a duna di conoce.

E di dos decision cu tambe a bay asina, tabata otro deci-

sion hopi recien di Minister Lampe pa diripiente crea un scol MAVO na Colegio Nigel Matthew na San Nicolas, cual ademas lo tin un impacto negativo riba demas scolnan MAVO na San Nicolas. E minister mes a bisa cu tin scarsedad di docente y cu no tin hopi estudiante. Pues esey ta haci e decision di crea un MAVO diripiente asina, aun mas ilogico.

“Mi ta compronde cu colega Lampe no ta gusta cu Ministerraad a overrule e, pero loke e colega aki mester compronde cu no ta pasobra nan a perde eleccion, regla no ta conta p’e. Mi ta percura pa nos Gobierno haci un tras-paso debido, cu un ‘over-



drachtsdocument’ debido y sin cu nos ta mara e ministerian nobo na decisionnan tuma durante e periodo demisionario. Pa mi integridad y bon gobernacion no ta solamente palabranan. Nan ta forma di traha y biba. Mi a baha gobierno pa motibo di integridad y mi ta determina pa practica e reglanan di bon gobernacion te na final. Esey

kiermen cu un minister no por implementa cambionan drastico durante periodo demisionario. Claro cu mi ta lamenta cu colega Lampe ta haciendo esaki. Ta e tin algun dia caba ta purba ataca mi y mancha mi reputacion. Pero mi ta kere cu pa awor tur hende sa ken ta ken”, Premier Wever-Croes a duna di conoce.

E di 5 dia di reunionnan cu stakeholders riba e tema di social:

‘Prome biaha cu e veld sociaal ta haya asina hopi atencion y inversion’

E di 5 dia di reunionnan cu stakeholders en conexion cu formacion di Gabinete Wever-Croes II a continua diaranson.

Diferente tema a wordo trata na unda cu stakeholders den nos comunidad a haya oportunidad pa duna nan punto di bista y pensamiento riba loke e proximo gobernacion entre MEP y RAIZ mester tene cuenta cune.

Esaki segun un comunicado di gobierno.

Riba e tema di social a hiba discusionnan extenso prin-



cialmente riba e Social Crisisplan y e Family Justice Center. Tabata tey presente un delegacion di profesional den e area aki pasobra ta hopi importante pa keda adresa e retonan social cu tin na

Aruba. Un enfoque special ta wordo poni riba abuso sexual specialmente di muchanan.

Prome Minister Evelyn Wever-Croes a enfatisa cu lo tin mas reunion riba e tema aki

den e siguiente dianan. E social crisis plan desde 2018 a haci hopi na unda cu a cuminsa cu hopi programa y proyecto. Un total di Awg. 26 miyon a wordo poni disponibel y esaki ta prome biaha cu e veld social ta haya asina hopi atencion y inversion.

“Aworaki nos ta saliendo for di Covid cu poder di Dios. Nos ta purbando di domina e aumento cu tin aworaki di e variante Delta pero nos mester cuminsa domina e problemanan social despues di Covid. Den esaki e team di experto riba tereno social ta trahando di un forma estructural pa wak con pa atende”.

E Family Justice Center ta un ehempel di un instancia cu a wordo crea pa atende specialmente cu e tema di abuso sexual di muchanan y con pa mesora atende cu e victima y e denuncia y pruebanan y cuminsa cu e recuperacion di e victima y su familia.

“Mi a keda asombra pa e presentacion y bo por wak cu nan tin un pasion grandi pa nan trabou cual ta pone mi sinti tranquil cu nos ta riba e bon caminda pasobra nos tin e veld importante aki di tema social den man di esnan cu realmente tin amor p’e”.

Di 4 dia di reunion cu stakeholders:

Reunion cu Serlimar a duna un miho bista di e situacion di e compania

Diaranson 20 di juli tawata un dia hopi extenso pa loke ta trata e reunionnan cu stakeholders en cuadro cu formacion di Gabinete Wever-Croes II. Riba e tereno di medio ambiente, Roland Croes di Serlimar tawata presente na unda cu a papia riba e compania mes pasobra manera ta cu conoci Serlimar ta den surseance van betaling.

El a wordo poni bou un tipo di curatela financiero aña pasa na mei door di e minister anterior di medio ambiente. Tawata importante pa sa con ta para awo cu Serlimar pasobra

no lo kier mira un compania estatal bay bancarota. E reunion cu Serlimar a duna un miho bista di e situacion di e compania.

Prome Minister Evelyn Wever-Croes a duna di conoce cu e situacion ta keda hopi critico sin embargo den e ultimo lunanan aki Serlimar a logra mira avansenan si den e tema financiero y organisatorio pero no ta sigur cu esaki ta suficiente ainda pa por scapa e compania di bati bancarota.

“E reunion cu Serlimar tawata riba e area laboral, comercio, salud y medio

ambiente. E meta na final di dia ta pa nos scucha kico ta locual ta importante pa e organisacionnan aki pa nos tene cuenta cu ne den e acuerdo di gobernacion cu nos ta trahando riba dje. Manera mi a splica diabierna, e acuerdo di gobernacion ta e prome stap, e di dos stap ta pa reparti e ministerionan entre RAIZ cu MEP y despues nos ta bay na e di tres stap pa apunta ministerianan pa e diferente carteranan y cuminsa e procedura di screening.

Serlimar ta un compania cu hopi reto, haciendo su maximo esfuerço pa rescata e



compania. Presente tabata director interino sra. Lacle, bewindvoerder sr. Rep y miembro di hunta di supervision sr. Croes. Di banda di formacion di Gabinete Wever-Croes II

tabata presente Glenbert F Croes, Carlos Guiamo, Ursell Arends, Geoffrey Wever, Endy Croes, Rocco Tjon, Hendrik Tevreden y Formador Evelyn Wever-Croes.